

Mga kasinatian gikan sa Kampo sa Israel

Kasinatian #1

Nahinumdom si Elder George A. Smith (1817–75) sa Kurom sa Napulog Duha ka Apostoles sa pipila ka kahimtang nga giatubang sa Kampo sa Israel panahon sa ilang panaw:



Si Propeta Joseph nakaambit sa kinatibuk-ang bahin sa mga kapaitan sa tibuok nga panaw. Dugang sa pag-asikaso sa panginahanglan alang sa Kampo ug sa pagdumala niini, siya naglakaw sa daghang higayon ug nakaangkon og paslot, dugoon, ug

nangngulngol nga mga tiil, nga maoy natural nga resulta sa paglakaw og 25 hangtod 40 ka milya kada adlaw sa ting-init niining tuiga. Apan atol sa tibuok nga panaw siya wala gayod magtagawtaw o magbagulbol samtang ang kadaghanan sa mga sakop sa Kampo nagbagulbol ngadto kaniya sa ilang nagsakit nga mga tudlo sa tiil, sa mga nangapaslot nga mga tiil, sa taas nga mga biyahe, ang kadaginoton sa ilang mga kan-onon, sa dili maayo nga matang sa pan, sa bati nga harinang mais [mais nga pan], pan-os [nadaot] nga mantikilya, bahoong nga dugos, uloron nga kusahos ug keso, ug uban pa. . . . Bisan og kami mao ang Kampo sa Zion, ug daghan kanamo ang dili mainampoon, walay maayong panghunahuna, walay pagmatngon, wala sa kaugalingon, buangon, o yawan-on, ug gani wala kami kabantay niini. Si Joseph nag-agwanta kanamo ug nagtudlo kanamo sama sa mga bata. Adunay daghan, hinoon, nga diha sa Kampo nga wala gayud magtagawtaw ug kinsa kanunay'ng andam ug buot mobuhat og unsay tinguha sa among lider. (George A. Smith, sa *Mga Pagtulun-an sa mga Presidente sa Simbahan: Joseph Smith* [2007], 348)

- Ngano kaha nga ang mga sakop sa kampo managlahi kaayo og reaksiyon sa samang mga kahimtang?
- Unsa ang makatabang nato nga magpabiling positibo dihang makasinati kita og kalisdanan sa atong mga paningkamot nga mosunod sa Manluluwas?

Kasinatian #2

Basaha ang Doktrina ug mga Pakigsaad 103:20 ug ang mosunod nga pamahayag ni Presidente Heber C. Kimball (1801–68) sa Unang Kapangulohan:

Bisan tuod og ang among mga kaaway padayong nanganti og pagpanghulga og kasamok, kami wala mahadlok, wala gayud



magpanuko sa pagpadayon sa among panaw, kay ang Dios nagauban kanamo, ug ang Iyang mga anghel nag-una kanamo, ug ang hugot nga pagtuo sa among gamay'ng grupo walay pagkatandog. Kami nahibalo nga ang mga anghel among kauban, kay kami nakakita kanila. (Heber C. Kimball, sa *Mga Pagtulun-an sa mga Presidente sa Simbahan: Joseph Smith* [2007], 349)

- Sa imong hunahuna, unsa kahay epekto niini nga panalangin kon apil pa ka sa Kampo sa Israel?
- Unsa ang pipila ka paagi nga gitabangan sa Ginoo ang Iyang mga sumusunod sa paghimo og lisod nga mga butang karon?

Kasinatian #3

Dihang usa ka adlaw na lang ang gilay-on sa Kampo sa Israel gikan sa Jackson County, lima ka armadong lalaki ang miduol nila. Nanghambog ang mga lalaki nga kapin sa tulo ka gatos ka tawo ang nagpaingon aron atakehon ang kampo. Samtang gihisgotan sa mga sakop sa kampo kon unsay himoon, si Propeta Joseph Smith miingon, “Barog nga malig-on ug tan-awa ang kaluwasan sa Dios.”

Baynte minutos ang milabay, mibundak sa kampo ang kusog kaayong ulan. Tungod sa ulan, paspas nga misaka ang tubig sa duol nga sapa, mao nga wala makatabok ang ilang mga kaaway aron atakehon sila. Daghang sakop sa Kampo sa Israel ang midangop sa gamayng simbahan sa duol. Pagkataod-taod, ang nabasa sa ulan nga si Joseph Smith misulod sa simbahan og mituaw, “Anaa niini nga bagyo ang Dios!”

Pagkasunod buntag human sa bagyo, nakita sa mga sakop sa kampo ang ilang mga tolda ug mga suplay nga basa kaayo ug nagkatag, apan walay mga lalaki nga miatake (gikutlo ug gipamubo gikan sa *Mga Santos: Ang Simbahan ni Jesukristo sa mga Santos sa Ulahing mga Adlaw*, vol. 1, *Ang Sumbanan sa Kamatuoran, 1815–1846* [2018], 203–04).

- Kon kabahin ka sa Kampo sa Israel, unsa kaha ang epekto sa imong pagbati bahin niini nga kasinatian bahin sa Propeta nga si Joseph Smith?
- Unsay gitudlo niini nga kasinatian bahin sa Dios sa lisod nga mga panahon sa imong kinabuhi?